



後村集卷之五十一

詩話

新集

此一卷專為杜陵補遺



陳拾遺故宅詩至比之郭元振唐人敬重拾遺如此  
文上人上方云庭前猛虎卧遂得文公庐吾師雨花  
外不下十年餘長者自布金禪龕只晏如又云王侯  
與蝼蟻同尽随丘墟願聞第一義回向心地初此僧  
不知何人必深于内典者

莫相疑行男兒生無所成頭皓白牙齒欲落真可惜  
憶昨獻賦蓬萊宮自怪一日聲輝赫集賢學士如堵

墻觀我落筆中書堂往時文彩動人主此日飢寒趨  
路傍晚將未契托年少當面輸心背面笑寄謝悠悠  
世上兒不爭好惡莫相疑它人于當面輸心背後笑

之下文必有餘怨公卒章優游閑暇了無忿寔

閬州絕句云殿前兵馬雖驍雄縱暴與羗渾同聞道  
殺人漢水上婦女多在官軍中當時殿前兵無紀律  
如此別篇云二十一家同入蜀惟殘一夕出駱谷必  
是子美自謂

柵木為風雨所拔云倚江柵樹草堂前故老相傳二  
百年誅茅卜居揔為此五月髣髴聞寒蟬東南飄風

動地至江翻石走流雲氣滄波老樹性所愛浦上童  
童一青蓋虎倒龍顛委榛棘淚痕血點垂膏臆我有  
新詩何處吟草堂自此無顏色茅屋為秋風所破云  
八月秋高風怒號卷我屋上三重茅南村羣童欺我  
老無力忍能對面為盜賊公然抱茅入竹去唇焦口  
燥呼不得秋天漠漠向昏黑布衾多年冷似鐵嬌兒  
惡卧踏裡裂床床屋漏無乾處兩脚如麻未斷絕安  
得廣厦千萬間大庇天下寒士俱歡顏風雨不動安  
如山嗚呼何時眼前突兀見此屋吾庐獨破受凍死  
亦足溪柵屋茅為風所拔不以草堂茅屋飄飄為憂

方有惜古木庇寒士之意其迂濶如此

天邊行云九度將書向洛陽十年骨肉無消息大麥  
行云大麥乾枯小麥黃婦女行云夫走歲問誰腰鐮  
胡與羗苦戰行云苦戰身死馬將軍云是伏波之子  
孫注馬璘也去秋行云去秋涪江木落時臂搶走馬  
誰家兒到今不知白骨處部曲有去皆無歸戰場冤  
魂每夜哭室令野營猛士悲此數篇皆可補史之缺  
文但遂州白骨不歸者失其姓名當放

草堂云孤矢暗江海難為遊五湖不忍竟舍此復來  
雜糅燕天下尚未寧健兒勝腐儒此篇嘆還吳未可

重值浣花榛蕪四松萬竹無恙隣里大官賓客喜歸  
可見隨寓而安之意于時天下未寧固有健兒勝腐  
儒之句卒章云飄飄風塵際何地置老夫飲啄愧殘  
生食薇不敢餘其語意雍容閑暇有雅人之深致  
牽牛織女篇云牽牛出河西織女處其東萬古永相  
望七夕誰見同神光竟難候此事終朦朧颯然精爽  
合何必秋遂通前人詠牛女所未及

壯遊詩押五十六韻在五言古風中尤多悲壯語如  
云往者十四五出遊翰墨場斯文崔魏徒以我似班  
揚又云脫畧小時輩結交皆老蒼東下姑蘇臺已具

浮海航到今有遺恨不得窮扶桑又云上感九廟焚  
下憫萬民瘡小臣議論絕老病客殊方雖荆卿之歌  
雍門之琴高漸離之筮音調節奏不如是之跌蕩豪  
放也

二角鷹篇云惡鳥飛飛啄金屋安得尔輩空其羣驅  
出六合泉馮分子美前有左綿画角鷹詩此二鷹乃  
真本非左綿画本也

馮懷篇云禍首燧人氏厲階董狐筆君看燈燭張轉  
使飛蛾密注云燧人火化而爭欲之心生董狐直筆  
而是非之端起其說甚新

可嘆篇云天上浮雲如白衣斯須改變如蒼狗古往  
今來共一時人生萬事無不有丈夫正色動引經鄴  
城客子王季友貧窮老瘦家賣履好事就之為携酒  
豫章太守高帝孫引為賓客故頗久聞道三年未曾  
語小心恐懼閉其口太守得之更不疑人生反覆看  
亦醜時危可仗真豪俊二人得置君側否詩言王季  
友誠賢士但為太守客當有獄市薤水之規今三年  
恐懼不出口何也說將且如此使其在前君側豈能  
補宸職之闕哉客以嘿求容主以嘿為賢恐非篤論  
然子美終以義和禹事業望王季殊不可曉末云吾

輩碌碌飽飯行風后力收長回首乃知子美以風后  
力救自期其抱負尤不淺矣

醉為馬墜云騎馬忽憶少年時散蹄迸落瞿塘石白  
帝城門水雲外低身直下八千尺向來皓首驚萬人  
自倚紅顏能騎射不虞一蹶終損傷人生快意多所  
辱朋知未問覩我顏杖藜強起依僮僕語尽還成開  
口笑堤携別掃清溪曲共指西日不相貸喧呼且覆  
杯中漉此篇可見壯老健衰之異未云何必走馬來  
為問君不見嵇康養生被殺戮南華云曾有單豹者  
巖居水飲七十有童孺之色不幸有遇餓虎殺而食之

有張毅者高門縣簿無不走也四十而有內熱之病  
以死豹養其內而虎食其外毅養其外而病攻其內  
乃公卒章之意

遣懷篇云梁孝王都邑之盛及追懷與高適李白同  
登吹臺未有拊孤之句公飄飄一羈旅而葛屨練裙  
之念如此高李豈無厚祿故人聞之得無愧乎

大奄蘭若云一老尤鳴日暮鍾諸僧尚乞齋時飯可  
見寺小僧貧之狀

折檻行云嗚呼房魏不復見秦王學士時難羨千載  
少似朱雲人至今折檻空嶙峋婁公不語宋公語尚

憶先皇容直臣前思房魏次援朱雲後憶晏宗未云  
尚憶先皇容直臣此必子美追懷諫省時論事不合  
傷今思古而作

朱鳳行云君不見瀟湘之山衡山高山巔朱鳳聲嗷  
嗷側身長願求其羣翅垂口噤心甚勞下懸百鳥在  
網羅黃雀景小尤難逃願分竹實及螻蟻足使鷓鴣  
相怒號衡嶽有朱鳥峯此篇言朱鳥孤立無助栖托  
雖高不忍自求飽必欲百鳥如黃雀之類在網羅者  
皆分竹實以及之不暇計鷓鴣羣怒號矣

遣遇篇云石門采蕨女鬻菜輸官曹丈夫死百役暮  
返空村號聞見事略同刻剝及錐刀貴人豈不仁視  
尔如莠蒿夫死于役僅存女婦采蕨粥菜以輸官天  
民之窮甚矣而官吏刻剝尤甚于錐刀此不獨指里  
胥亭長輩內自租庸使外自觀察使不得不受其責  
故有貴人豈不仁視汝如莠蒿之句錄之以告居大  
位者

望嶽云南嶽配朱鳥秩禮自百王歛吸領地靈鴻洞  
半災方邦家闕祀典在德非馨香巡守何寂寥有虞  
今則亡祝融五峯尊峯峯次低昂紫蓋獨不朝爭長  
蝶相望恭聞魏夫人羣仙夾翱翔望嶽之作多矣余

行從過焉歎靈瑣坐悅亭宿勝業寺累日嶽令與山中  
人謂余慕向道者將以昧爽登絕頂夕忽大雪余  
尤攀緣而上望上封咫尺雪泥沒膝不可行然耳目  
之所睹記公詩真此山圖經也

謁玄元廟次昭陵二詩鉅麗駿壯為千古五言律詩  
典則其歸羨開基青望守成傷今思古有無窮忠愛  
之義

與韋左丞五言二篇當以古風為勝左丞名濟又與  
韋左相律詩二十韻頗稱其相業此韋公名見素  
與張卿二十韻張卿名頊說子均第弟兄貴盛遭漁

陽之變合門徇難未足以報唐家今相率北面而臣  
賊相帝璿也故明皇欲致之死汜全要領可謂失刑  
寄高書記云歎息高生老新詩日又多羨名人不及  
佳句法如何主將收才子崆峒足凱歌聞君已朱紱  
且得慰蹉跎憶李白云不見李生久徯狂真可哀世  
人皆欲殺吾意獨憐才敏捷詩千首飄零酒一杯匡  
山讀書處頭白早歸來此二篇非高李不敢當非子  
羨不能道

遊何將軍山林前十首後半之如云鮮鯽銀絲鱸香  
芹碧澗羨又云萬里戎王子何年別月支漢使徒空

劉神農竟不知注云何將軍常征西域禽其王子歸  
傳其地花草數種又云花安鴛捕蝶溪喧獺起魚又  
云手自移蒲柳家終足稻梁何將軍舊注莫詳其人  
公詩有將軍不好武稚子總能文之句必勲貴中之  
好事者

遣興云驥子好男兒前年學語時問知人客姓誦得  
老夫詩世亂怜渠子小家貧仰母慈鹿門携不遂鴈  
足繫難期天地軍麾滿山河戰角悲僮歸免相失見  
日敢辭遲驥子宗武小名公稱之如此公以其知客  
姓誦翁詩為喜又別篇云驥子春猶隔又云驥子最憐

渠鍾情幼子如此而無一字及熊兒故余疑宗文失  
學

憶弟云喪亂同吾弟飢寒傍濟州人稀書不到兵在  
見何由又云百戰今誰在三年望汝歸又元日寄妹  
云近聞韋氏妹迎在漢鍾離春城迴北斗郢樹發南  
枝不見朝正使啼痕滿面垂公流落顛沛而一念不  
忘弟妹內云百戰今誰在三年望汝歸又云不見朝  
正使啼痕滿面垂讀之感慨不但隆交愛而厚倫紀  
其厭離亂而思承平以不見朝正使為恨言四方表  
章未達行在恐未有見妹之期耳



聞官軍臨賊篇二十韻多佳句如云秦山當警蹕漢苑入旌旄路濕羊腸險雲橫雉尾高可見崎嶇巴蜀播遷梁益乘輿危迫之狀元帥歸龍種司空握豹韜注云廣平王為元帥郭汾陽副之前軍蘇武節左將呂虔刃其叙時事甚悲壯老健未云家家賣釵釧以待獻香醪寧賣釧以易香醪可見時人厭亂之極贈嚴老閤云客禮容疎放官曹可接聯新詩句句好應任老夫傳嚴武雖跌蕩不羈然能容社陵亦豪傑之士其詩往往附見杜集所謂句句好之評亦非過情之譽

送郭中丞云箭入昭陽殿笳吟細柳營內人紅袖泣王子白衣行詳此二聯必是迷代宗幸陝之事春宿左省云不寢聽金鑰因風想玉珂明朝有封事數問夜如何岑參寄左省杜拾遺篇云聯步趨丹陛分曹限紫薇曉隨天仗入暮惹御香歸白髮悲花落青雲羨鳥飛聖朝無闕事自覺諫書稀岑杜同在諫省時兩宮蒙塵時事可言者多矣杜有封事問夜如何岑云聖朝無闕事又云自覓諫書稀岑有愧于杜多矣

秦州五言二十首內云州圖領同谷驛道出流沙降

虜兼千帳居人有萬家馬驕珠汗落胡舞白蹄斜古  
注白蹄胡名又云鼓角緣邊郡川原欲夜時萬方聲  
一槩吾道竟何之又云傳道東柯谷深歲數十家瘦  
地翻宜粟陽坡可種瓜又云萬古仇池穴潛通小有  
天何時一茅屋送老白雲邊唐人遊邊之作數十篇  
中間有三數篇一篇中間有二一聯可采若此二十  
篇山川城郭之異土地風氣所宜開卷一覽盡存是  
矣網山送新帥云杜陵詩卷是圖經豈不信然聽角  
篇云萬方聲一槩吾道竟何之聽角者多矣孰知此  
言之悲哉

示姪佐云嗣宗諸子姪早奄仲容賢舊注佐草堂在  
東柯谷又三首內云白露黃粱熟分張素有期又云  
甚聞霜薤白重惠意如何佐別業有黃粱又有霜薤  
分遺尊老其生理必小康者

阮隱居致薤云盈筐承露薤不待致書求束比青芻  
色圓齊玉筋頭衰年閑鬲冷味煖腹無憂公轉側兵  
火間飢寒繼縷以詩致之如薇如蕨如薤如笋如薤  
如蒼耳如蒿苳皆入賦詠真成一菜肚老人矣然公  
于菜中尤重薤有味煖腹無憂之句非嗜生冷者貴  
人日費萬錢或一生食萬羊子美晚進以來陽令饋

白酒牛角暮卒豈若常蔬茹乎

客星云舍南舍北皆春水但見群鷗日日来花徑不曾緣客掃蓬門今始為君開盤飧市遠無兼味樽酒家貧只舊醅肯與隣翁相對飲隔籬呼取盡餘盃此篇若戲效元白体者

嚴武答杜二云卧向巴山落月時兩鄉千里夢相思可但步兵偏愛酒也知光祿最能詩江頭赤葉楓愁客籬外黃花菊對誰歧馬望君非一度冷猿秋鴈不勝悲嚴公詩亦佳作豈近朱者赤耶杜有別嚴公五言云江村獨歸去寂寞養殘生可見子美潔于去就

之際

懷舊云地下蘇司業情親獨有君那因喪亂後便有死生分老罷知明鏡悲來望白雲自從失詞伯不復更論文源明得卒章十字可以不朽矣

題玄武禪師屋壁云錫飛常近鶴杯渡不驚鷗玄武師未詳

贈李白云豈有青精飯使我顏色好苦乏大藥資山林跡如掃李侯金閨彥脫身事幽討亦有梁宋遊相期拾瑤草公與岑參高適詩皆人情世法惟與謫仙唱和皆世外一種說話

別房太尉墓云对墓陪謝傳把劍覓徐君用事極精切

自閬赴蜀云棧懸斜避石橋斷却尋溪山館云山鬼吹燈滅厨人語夜闌蜀道荒僻如此

呈嚴公云胡為未幕下祗合在舟中又云老妻憂坐痺幼女問頭風又云寬容存性拙翦拂念途窮又云

曉入朱扉啓昏歸画角終此篇曲尽幕府賓主情詎春日江村云赤管隨王命銀章付老翁豈知牙齒落

名在薦賢中注漢官儀丞郎月給赤管大筆一雙公時以起部參謀服緋故其辭如此卒章未免有周南

留滯之歎然微而婉

江上值水云為人性僻耽佳句語不驚人死不休焉得思如陶謝手令渠述作與同遊前兩句自負不淺卒章乃推尊陶謝可見前哲服善不爭名之意

寄杜位云逐客雖皆萬里去悲君已是十年流玉壘題書心緒乱何時更得曲江遊此篇言位近聞寬法

離新州注云位京中宅近西樓新州今屬廣東去京師遠卒章思與位渡游曲江則非京師之新州矣當

詳攷

登高云無邊落木蕭蕭下不尽長江衮衮來萬里悲



同補袞奉詔許庠裾又云御鞞金駮袞宮硯玉蟾蜍  
此篇三十韻叙舊頗詳祕書不書名必是與公同扈  
送入蜀者現不才同補袞奉詔許庠裾之句似與公  
同諫省金駮袞玉蟾蜍近臣方有此賜史失其名當  
攷  
狐鴈云狐鴈不飲啄飛鳴聲念群誰憐一片影相失  
萬重雲望尽似尤見袞多如更聞野鷗無意緒鳴噪  
自紛紛讀此篇便見得鮑當輩止是小家數  
吾宗篇云吾宗老孫子質朴古人風耕鑿安時論衣  
冠與世同昔温公約康節服深衣答云某今人只服

今衣温公不能強

溪上云塞俗人無井山田飯有沙滾西土風

八月十六夜云河漢近人流絕佳

秋興云聞道長安似奕碁百年世事不勝悲王侯第  
宅皆新主文武衣冠異昔時直北闕山金鼓振征西  
車馬羽書遲魚龍寂寞秋江冷故園平居有所思公  
詩叙亂離多百韻或五十韻或三四十韻惟此篇簡  
而切

社日云今日江南老它時渭北童又云鴛鴦迴金闕  
誰憐病峽中羈旅懷故鄉老大憶髫年人之至情也

公生長韋社老逢社日百官朝天公獨病卧峽中情見乎辭如此

詠懷古跡內先主孔明廟云古廟杉松巢水鶴歲時伏臘走村翁武侯祠屋長鄰近一体君臣祭祀同又云萬古雲霄一羽毛又云伯仲之間見伊吕卧龍公没已千載而有志世道者皆以三代之佐許之如云萬古雲霄一羽毛如儕之伊吕伯仲間而以蕭曹為不足道此論皆自子美發之考亭南軒近世大儒不能廢也昭君村云画图省識春風面環佩空歸月夜魂亦佳句

諸將篇云獨使至尊憂社稷諸君何以荅昇平其責望諸將深矣此篇謂張仁愿築三城本欲掃平吐蕃豈知乃用以揅朔方言九節度之敗

宗武生日云詩是吾家事又云覓句新知律乃翁稱之如此而宗武詩無一字存者不若蘇叔黨有集行世

有感云諸侯春不肯使者日相望又云不過行儉德盜賊本玉臣又云領郡輒無色之官皆有詞頭聞哀痛詔端拱阿瘡痍此三數聯略見當日時事使者相望而不負自若必是內租庸外規察諸使符牒督賦

急于星火領郡之官者皆憚行歟至于欲以儉德化盜賊為王臣又欲下哀痛詔以問瘡痍唐人惟元結陽城有此意公于春陵行至比之華星秋月不刊之言也

東屯云築場憐穴蟻拾穗許村童可見民胞物與之意

柳司馬至云有使歸三峽相過問兩京函閔尤出將渭水東屯兵設備邯鄲道和親邏些城幽燕唯烏云商洛少人行公去國萬里逢人輒問兩京此數聯是大曆間事

元日示宗武云汝啼吾手戰吾笑汝身長前有明年共我長之語此又云吾笑汝身長見愛子長成而喜憶江東弟不見而悲其慈愛如此

放舡出峽四十韻按公天寶十五載入蜀九十三年羈旅非一處而在夔最久至大曆三年始出峽之江陵又二年卒于耒陽蜀中諸詩惟夔最多四十韻反復曲折若不忍去雲安者

贈起居田舍人澄詩云舍人退食收封事宮女開函近御筵唐以舍人給事中司匭事又云宮女開函以所投封事奏御又云晴窓點檢白雲篇注云謂武帝



秋風詞

張垧雖為詞臣恩澤侯尔今有黃麻似六經之句未  
之敢聞此篇押十六韻叙垧富貴及交游之情

親密然卒章皆自拔于踈外無附麗之意與別韋左  
丞詩云常擬報一飯况懷辭大臣若甚德韋公者然  
未句云白鷗沒浩蕩萬里誰能馴公自植立每如此  
哀王孫云長安城頭頭白烏夜飛延秋門上呼又向  
人家啄大屋屋底達官走避胡金鞭斷折九馬死骨  
肉不待同馳驅腰下空玦青珊瑚可憐王孫泣路隅  
問之不肯道姓名但道因苦乞為奴高帝子孫盡墜

準龍種自與常人殊乱世惟富貴者尤難全王孫墜  
不意青草湖扁舟落吾手中原消息斷黃屋今安否  
去蜀之吳楚身與妻子弟妹未知逃生之所而以中  
原消息斷黃屋安否為憂此山谷所以有長使詩人  
拜画图煎膠續絃千古無之歎

後村集卷之五十一

後村集卷之五十二

詩話

孟襄陽詩如微雲澹河漢疎雨滴梧桐之句館閣諸  
彥嘆服而集中不收豈逸其全篇乎寄衣曲云畏瘦  
宜傷窄防寒更厚裝又魚行潭樹下猿挂島蘿間警  
語不一老杜少所推服獨稱其句句堪傳集中每以  
孟先生目之

韋蘇州絕句云紫閣西邊第幾峯茅齋夜雪虎行蹤  
遙看黛色知何處欲出山門尋暮鍾五言云馬卿尤  
有壁漁父自無家想子今何處扁舟隱荻花溫泉行

出身天竺今年幾頑鈍如鎚命如命作官不了却歸  
來還是杜陵一男子北風慘慘投溫泉忽憶先皇遊  
幸年蒙恩每浴華池水扈獵不蹂渭北田一朝鑄鼎  
降龍馭小臣髯絕不得去今來蕭瑟萬井空惟見蒼  
山起煙霧可憐蹭蹬失風波仰天大叫無柰何散裘  
羸馬過故苑賴遇主人杯酒多沈下賢秦夢記云泣  
奠一枝紅生同死不同梨花寒夜深閉翠微宮唐  
詩多流麗嫵媚有粉黛氣或以辨博名家惟蘇州繼  
陳拾遺李翰林崛起為一種清絕高遠之言以矯之  
其五言精巧處不減唐人至于古體歌行如溫泉行

之類欲與李杜並驅前世惟陶同時惟柳可以把臂  
入社餘人皆在下風

岑參送人落第五言云獻賦頭欲白還家衣已穿羞  
過灞陵樹歸種汶陽田客舍少鄉信赤頭無酒錢聖  
朝徒側席濟上獨遺賢又送顏少府云愛客多酒債  
罷官無俸錢又宿太白東溪李老舍寄弟姪云渭上  
秋而過北風正騷騷天晴諸山出太白峯最高主人  
東溪老兩耳生長毫遠近知百歲子孫皆二毛中庭  
井欄上一架猕猴桃石泉飲香粳酒甕開新糟愛茲  
田中趣始悟世上勞我行有勝事書此寄尔曹春夢

七言云洞庭昨夜春風起故人尚隔湘江水枕上片  
時春夢中行盡江南幾千里韋負外家花樹歌云今  
年花似去年好去年人到今年老始知人老不如花  
可惜落花君莫掃太白胡僧歌云聞有胡僧在太白  
蘭若去天三百尺手持楞伽入中峰世人難見但聞  
鐘窓边杖錫解兩虎床下鉢盂藏一龍草衣不針復  
不線兩耳垂肩眉覆面此僧年幾那得知手種青松  
今十圍心將流水同清淨身與浮雲無是非商山老  
人已曾識願一見之何由得山中有僧人不識城裡  
看山空黛色登鄴城古体云下馬登鄴城城空復何

見東風吹野火暮入飛雲殿又云城隅南對望陵臺  
漳水東流不復回武帝宮中人去尽年年春色為誰  
來

高適五言云散帙至棲鳥明燈留故人又云秋並何  
青青藥苗數百畦耕耘有山田紡績有山妻簷前舉  
醇醪竈下烹隻雞人生苟如此何必組與珪春望云  
出門何所見春色滿平蕪可嘆無知己高陽一酒徒  
漁樵歌云曲岸深潭一山叟駐眼看釣不移手世人  
欲得知姓名良久問他不開口笋皮笠子荷葉衣心  
無所營守釣磯料得孤舟無定止日暮持竿何處歸

七言句云旅館寒燈夜不眠客心何事轉悽然故鄉  
今夜應千玉愁鬢明朝更一年高岑二公詩氣魄力  
量音調節奏生逢開元承平之際與李杜二公更唱  
迭吟所謂治世之音也天寶亂離之後所作率多窮  
愁感嘆意錄之以觀世變

盧綸送萬巨六言云人愁荒村路細馬怯寒溪水深  
望盡青山獨立更知何處相尋又白髮嘆五言云髮  
白曉梳頭女驚妻淚流不知絲色後堪得幾回秋送  
成都丞云棧長山雨響溪亂水田稀送玉山人遊江  
東云燕歸巢已盡鶴語冢難尋同柳侍郎題新昌里

云庭莎成野席欄藥是家蔬夜中得循州趙司馬書  
寄回使云瘴海寄雙魚中宵達我居兩行燈下淚一  
紙嶺南書地說炎蒸極人稱老病餘殷勤報賈傳莫  
共酒杯踈泛軍行云雪嶺無人跡冰河有鴈聲李陵  
甘此沒惆悵漢公卿山中別墅云葺橋雙鶴豎收果  
衆猿隨訓麻道士見寄云聞逐樵夫閑看碁忽逢人  
世是秦時開雲種玉嫌山淺渡海傳書怯鶴遲陰洞  
石幢微有字古壇松樹半無枝煩君遠視青囊籙願  
得相送一問師謁液上人云半夜峯中有磬聲偶逢  
樵者問山名上方月暗聞僧語下路林疎見鹿行野

鶴巢邊松最老毒龍潛處水偏清願得遠公知姓字  
焚香洗鉢迴浮生春日登樓有懷云年來笑伴皆歸  
去今日晴明獨上樓晚次鄂州云估客晝眠知浪靜  
舟人夜語蒼潮生舊業已隨征戰盡更堪江上鼓鼙  
聲姚美人拍箏歌云昭陽伴裡最聰明出到人間總  
長成遙知禁曲難翻處尤自君王說小名

李益古促促曲云促促何促促黃河九回曲嫁與棹  
舡郎空床將影宿不道君心不如石那令妾貌長如  
玉贈邢校書云俱送四方士共合九秋中斷蓬與落  
葉相值各因風送流人云謗遠人多惑官微不自明

疇昔長沙事三年召賢生喜見外弟云十年亂離後  
長大一相逢問姓驚初見稱名憶舊容別來滄海事  
語罷暮天鍾明日已陵道秋山又幾重登夏州城云  
無定河邊數株柳共送行人一盃酒胡兒起作和蕃  
歌齊唱嗚嗚盡垂手又云回頭忽作異方聲一聲回  
盡征人首度破訥沙云眼見風來沙旋移經年不省  
草生時莫言塞北無春到縱有春來何處知听梁州  
曲云鴻鴈新從北地來聞聲一半却飛回金河戍客  
腸應斷更在秋風百尺臺飲馬泉云從來凍合關山  
路今日分流漢使前莫使行人照容鬢恐驚憔悴入

新年宿石泉驛南望黃堆峰云  
邊城已在虜塵中  
峰火南飛入漢宮  
漢庭議事先黃老  
麟閣何人定戰功  
邊思云腰懸錦帶佩吳鉤  
走馬曾防王塞秋  
莫笑關西將家子  
祇將詩思入涼州  
盧李中表兄弟詩律齊  
名其五七言妙絕者已選入絕句  
然兩生皆從軍出塞他詩可脣角傳誦者人多容易看過  
余既耄耄悉錄于編以備遺忘

元次山雪中懷孟武昌云  
冬來三度雪農者歡歲稔  
我夢想已濡各得在倉廩  
天寒未能起孺子驚人寢  
云有山客來籃中見冬簞  
燒柴為溫酒煮蕨為作瀹

容亦愛杯搏思君共杯飲  
所嗟山路閉時節寒又甚  
不能苦相邀興盡還就枕  
賊過示官吏云昔歲逢太平  
山林二十年泉源在庭戶  
洞壑當門前井稅有常期  
日晏尤得眠忽然遭世變  
數歲親戎旃今來典斯郡  
山夷又紛然城小賊不屠  
人貧傷可憐是以陷鄰境  
此州獨見全使臣將王命  
豈不如賊焉今彼徵歛者  
迫之如火煎誰能絕人命  
以作時世賢思欲委符節  
引竿自刺舡將家就魚麥  
歸老江海邊春陵行云  
軍國多所須切責在有司  
供給豈不憂徵歛又可悲  
州小經亂亡遺人實困疲  
大鄉無十家大族命單羸

朝食是草根暮食乃木皮出言氣欲絕意速行步遲  
追呼尚不忍况乃鞭朴之郵亭傳急符來往迹相追  
更無寬大息但有迫促期欲令粥兒女言發恐亂隨  
悉使索其家而又無生資听彼道路言怨傷誰復知  
去冬山賊來殺奪歲無遺所願見正官撫養以惠慈  
柰何重驅逐不使存活為安人天子命符節我所持  
州縣忽亂亡得罪復是誰逋緩違詔令蒙責固所宜  
前賢重守分惡以禍福移亦云貴守官不愛能遠時  
顧惟孱弱者正直當不虧何人采國風吾欲獻此辭  
次山春陵五言真稷契口中語杜陵粲粲元道州之

篇即此二詩之跋尾也然其時內租庸使外觀察使  
未有敢奏劾次山以附益聚斂求悅者使遇今執牙  
籌析秋豪者居主計之任則次山齏粉矣

王維五言云興來啼鳥緩坐久落花多又烹葵邀上  
客肴竹到貧家又古木無人徑深山何處鍾又拓漿  
菘米飯筠醬露葵羹又行到水窮處坐看雲起時偶  
然值林叟談笑無還期又住處名愚谷何煩問是非  
又蔡邕今已老書籍與何人早春云憶君長入夢歸  
晚更生疑不及紅簷燕雙栖綠草時桃源行云樵客  
初傳漢姓名居人未改秦衣服又藤花欲闇歲猿子



栢葉初齊養麝香洛陽女兒行云自憐碧玉親教舞  
不惜珊瑚持與人少年行云縱死尤聞俠骨香老將  
行云少年十五二十時步行奪取胡馬騎射殺山中  
白額虎肯數鄴下黃鬚兒一身轉戰三千里一劍曾  
當百萬師漢兵奮迅如霹靂虜騎崩騰畏疾蕞衛青  
不敗由天幸李廩無功緣數竒自送弃置便衰朽世  
事蹉跎成白首昔時飛箭無全目今日垂楊生左肘  
路傍時賣故侯瓜門前學種先生柳茫茫古木連窮  
巷遼落寒山對虛牖誓令踈勒出飛泉不似潁川空  
使酒賀蘭山下陣如雲羽檄交馳日夕聞節使三河

募年少詔書五道出將軍試拂銖衣如雪色聊持宝  
劍動星文願得燕弓射天將恥令越甲鳴吳軍莫嫌  
舊日雲中守尤堪一戰立功勲雜五言云家住孟津  
河門對孟津口常有江南舡寄書家中否又君自故  
鄉來應知故鄉事來日綺窓前寒梅著花未石丞不  
汙天室之亂大節凜然其詩擺落世間腥腐非食煙  
火人口中語其五六七言已多選入絕句今摘其古  
律体長篇警句于此

劉隨州送秦系云惆悵青山路煙霞老此人新年云  
老至居人下春歸在客先尋洪尊師云鶴老難知歲

梅寒未作花送人云詩書滿榻舍征稅及漁竿送穆  
喻德云事且皇天在歸遲白髮生送李中丞云流落  
征南將曾驅十萬師罷歸無舊業老去戀明時獨立  
三邊靜輕生一劍知茫茫漢江上日暮復何之餘干  
旅舍云渡口月初上鄰家漁未歸鄉心正欲絕何處  
搗寒衣北歸次秋浦云舊路青山在餘生白首歸漸  
知行近北不見鷓鴣飛松江獨宿云明月天涯夜青  
山江上秋一官成白首萬里寄滄洲獄中見壁面佛  
云不謂銜冤處而能窺大悲獨棲叢棘下還見雨花  
時地狹青蓮小城高白日遲幸親方便力尤畏毒龍

欺六言云危石繞通鳥道空山更有人家桃源定在  
深處澗水浮來落花送嚴維云明日行人已遠空餘  
淚滴回潮別嚴士元七言云細雨濕衣看不見闌花  
落地听無聲過鄭山人居云寂寂孤鶯啼杏樹寥寥  
乙犬吠桃源落花芳草無尋處萬壑千峯獨閉門見  
新曆云愁占著草終難決病对椒花倍自憐獻李節  
度云家散萬金愁酬士死身留一劍答君恩過賈誼  
宅云漢文有道息尤薄湘水無情吊豈知送人遊天  
台云落日獨搖金策去深山誰向石橋逢非所云斗  
門誰與看冤氣盆下無由見太陽過裴舍人故居云

籬花尤及重陽發鄰笛那堪落日听贈于越居云自  
 用黃金買地居能嫌碧玉隨人嫁送郭主簿赴嶺南  
 云料錢用尽却為謗食客室多誰報恩此二句似為周晉仙發  
 齊一和尚影堂云身寄虛空如寓客心將生滅是浮  
 雲又云舊地愁看隼樹在空堂只是一燈懸別李萬  
 云故人早負予將器誰言未展平生意想君疇昔高  
 步時肯料如今折腰事上裴尹西城黯黯斜暉落  
 衆鳥紛紛皆有託獨立雖輕燕雀群孤飛還惧鷹鷂  
 搏自憐天上青雲路吊影徘徊獨愁暮銜花縱有報恩  
 時擇木誰容托身處歲月蹉跎飛不進羽毛顛顛何

人問遶樹空隨鳥鵲驚巢林只有鷓鴣分主人庭中  
 蔭喬木愛此清陰欲棲宿少年挾彈遙相猜遂使鷲  
 飛往復迴不辭奮翼向君去唯怕金丸隨後來唐人  
 號隨州為五言長城其五言六言七言妙絕者已選  
 入絕句錢起輩非不極力欲躋攀隨州尺寸終不近  
 傍豈才分有所局耶其七言長篇如上裴尹小鳥之  
 篇反復宛轉詞近而意遠似為五言所蓋  
 張籍五言云長因送人處憶着別家時贈僧云翻經  
 上蕉葉挂衲落藤花宿江店云停燈待賈客賣酒與  
 漁家五言云月冷邊帳濕沙昏夜探遲征人皆白首

誰見滅胡時又云夜鹿伴茅屋秋猿守栗林又云蛙  
聲籬落下草色戶庭間七言云一山海上無城郭唯  
見松牌記象州又云山東二十餘年別今日相逢在  
上都說盡向未無限事相看摩捋白髭鬚又云洛陽  
城裡見秋風欲作歸書意萬重復恐恁恁說不尽行  
人臨發又開封又云于君去後交遊少東野無耒筐  
筍貧賴有白頭王建在眼前尤見詠詩人又崑崙兒  
云自愛肌膚黑如漆行時半脫木綿裘白苧云皎皎  
白苧白且鮮將作春衣稱少年裁縫長短不能定自  
持刀尺向姑前復恐蘭膏污纖指常遣傍人收墮珥

衣裳着時寒食下還把玉鞭鞭白馬寄衣曲云官家  
亦自寄衣去貴送妾乎着君身高堂姑老無侍子不  
得自到邊城裡慙慙為看初着時征夫身上宜不宜  
又七言云願為玉銜繫華軾終日有聲在君側又云  
洛陽北門北邙道喪車鞦韆入秋草車前齊唱薤露  
歌高墳新起白冢冢朝朝暮暮人送葬洛陽城中人  
更多千金立碑高百尺終作誰家柱下石山頭松柏  
半無主地下白骨多于土寒食家家送紙錢鷓鴣作  
窠啣上樹人居朝市未解愁請君暫向北邙遊又內  
宴歸云金吾不敢問行由又七言云誰言遠別心不

易天星墜地能為石幾時斷得城南陌勿使居人有  
行役又云九月匈奴殺邊將漢軍全歿遼水上萬里  
無人收白骨家家城下招魂葬婦人依倚子與夫同  
居貧賤心亦舒夫死戰場子在腹妾身雖存如畫燭  
又云願君到處自題名他日知君從此去又賈客云  
停盃共說遠行期入蜀經蠻誰別離金多衆中為上  
客夜夜篝緡眠獨遲楚宮行云章華宮中九月時桂  
花半落紅橘垂江頭騎火照輦道君王夜泛雲夢歸  
下輦更衣入洞房已姬起舞向君王迴身垂手結明  
璫願君千年萬年壽朝出射麋夜飲酒永嘉行云黃

頭鮮卑入洛陽胡兒持戟昇明堂晉家天子作降虜  
公卿奔走如牛羊紫陌旌旗暗相觸家家雞犬驚上  
屋婦人出門隨亂兵夫死眼前不敢哭九州諸侯自  
顧土無人領兵未護主北人避胡多在南南人至今  
能晉語董逃行云洛陽城頭火燿燿亂兵燒我天子  
宮宮城南面有深山老幼歲其間重巖為屋椽  
為食丁男夜行候消息聞道官軍屯掠人舊里如今  
歸未得董逃行漢家幾時重太平又七言云君愛龍  
城征戰功妾願青樓歡樂同人各生各有所欲詎得  
將心入君腹又還珠吟云君知妾有夫贈妾雙明珠

感君纏綿意擊在紅羅襦妾家高樓連苑起良人執  
戟明光裡知君用心如日月事夫誓擬同生死還君  
明珠雙淚垂何不相逢未嫁時又云上陽宮樹黃  
渼綠野射入苑食麋鹿陌上老翁雙淚垂共說武皇  
幸時

王建五言云蛙鳴蒲葉下魚入稻花中又云閉門留  
野鹿分食養山雞又云妻愁耽酒甚人恠考詩嚴又  
云野蔓溪菜滑山紙水苔香又云掃渠憂竹早澆地  
引蘭生又云送經還野寺移竹入幽林六言云魚藻  
池邊射鴨芙蓉苑裡看花日色赭袍相似不着紅  
鸞

扇遮寒食行云寒食家家出古城老人看屋少年行  
丘壠年年無舊道車徒散行入衰草牧僮馭牛下塚  
頭畏有家人來洒掃遠人無墳水頭祭還引婦姑望  
鄉拜三日無火燒紙錢紙錢那得到黃泉但看壠土  
無新土此中白骨應無主北邙云行北邙山頭少闌  
土尽是洛陽人舊墓舊墓人家歸葬多堆着黃金無  
買處天涯悠悠葬日促崗坂崎嶇不停轂高張素幟  
繞銘旌夜唱挽歌山下宿洛陽城北渡城東魂車祖  
馬長相逢車轍廣若長安路蒿草多于松柏樹山頭  
澗底石漸稀盡向墳前作羊虎誰家石碑文字滅後

人重取書年月朝朝車馬送英迴還起大宅與高臺  
溫泉宮云十月一日天子來青繩御路無塵埃宮前  
內裡湯各別每箇曰玉芙蓉開朝元閣向山上起城  
繞青山龍暖水夜開金殿看星河宮女知更月明裡  
武皇得仙王母去山雞晝鳴宮中樹溫泉泱泱出宮  
流宮使年年修玉樓禁兵去盡無射獵日西麋鹿登  
城頭梨園弟子偷曲譜頭白人間教歌舞田家行云  
麥收上場猶在軸的知輸得官家足不望入口復上  
身且免向城賣黃犢田家衣食無厚薄不見縣門身  
即樂遼東行云年年郡縣送征人將與遼東作丘坂

寧為草木鄉中生有身不向遼東行射虎行云自去  
射虎得虎歸官差射虎得虎遲獨行以死當虎命兩  
人相疑終不定朝朝暮暮空手迴山下綠苗成道狂  
遠立不敢污箭鏃聞死還來分虎肉惜留猛虎著深  
山射殺恐畏終身閑贈王樞密云三朝行坐鎮相隨  
今上春宮見小時脫下御衣先賜着進來龍馬每教  
騎長承密旨歸家少獨奏邊机出殿遲自是姓同親  
向說九重爭遣外人知贈駙馬云金埒減添栽藥地  
玉鞭平與賣書人又七言云生金有氣尋還遠仙藥  
成窠見即移又云薦書入後無消息賣盡寒衣却出

城又云草堂未辨終須置松樹難成亦且裁樂府至  
張籍王建道盡人意中事惟半山尤賞好有看若尋  
常最奇崛成如容易極艱辛此十四字唐樂府斷案  
也本朝唯張文潛得其遺意

盧仝寄男袍絲五言云別來三得書書道違離久書  
處甚龐殺旦喜見汝手殷十七又報汝文頗新有當  
是汝母賢日夕加訓誘竹林吾最惜新筍好看守箨  
龍正稱寃莫教入汝口丁寧囑託汝汝活箨龍否兩  
手莫破拳一吻莫飲酒莫惱添丁郎淚子作面垢莫  
引添丁郎赫赤日裡走它日吾歸來家人苦彈糾一

百放一下打汝九十九此篇用尽俗字而不害其為  
奇崛何常似近世詩人學鍊字執守歲云老未經節  
臘樂事甚悠悠不及兒童日都盧不解愁新蟬云泉  
溜潛幽咽琴鳴乍往還長風翦不斷還在樹枝間村  
醉云村醉黃昏歸健倒三四五摩挲青莓苔嗔我驚  
尔不并請客云我願拔黃泉輕舉隨君去客謝并云  
改邑不改井此是井卦辭并公莫驚怪說我成憨癡  
我縱有神力爭敢將公歸揚州惡百姓疑我卷地皮  
掩関銘云蛇毒毒有形藥毒毒有名人毒毒在心对  
面如弟兄美言不可听深于千丈坑不如掩関坐幽



烏時一聲含曦酬玉川云長壽寺石壁盧公一首詩  
鯨飲海冰尽露出珊瑚枝海神知貴不知價留向人  
間光照夜嘆昨日云昨日之日不可追今日之日須  
史期如此如此復如此壯心死尽生鬢絲秋風葉落  
客腸斷不辨斗酒開愁眉賢名聖行甚辛苦周公孔  
公徒自欺盧馬结交詩退之必見之無一語及之豈  
未見耶新年云太歲只遊桃李徑春風肯管歲寒枝  
與沈山人云不須服藥求神仙神仙意智或偶然自  
古聖賢放入土淮南鷄犬驅上天白日上昇應不惡  
藥成且輟一丸藥暫時掩上山門路釣竿插在枯桑

樹當時只有烏窺窬更亦無人得知處家僮若失釣  
魚竿定是猿猴把將去玉川詩有古樸而竒怪者有  
質俚而高深者有僻澁而條鬯者元和大曆間詩人  
多出韓門韓于諸人多稱其名惟玉川常加先生二  
字退之強項非苟下人者今人但誦其月蝕及茶詩  
而它作往往容易看了此公雖與世殊嗜好然以詩  
求之于養生藥有所聞其序閨情酒興纏綿悲壯庶  
以來詩客酒徒不能道也其間理到之言他人所弃  
者今存于篇又常州孟諫議座上聞韓貞外貶國子  
博士有感五首云忽見除書到韓君又李官死生送

有命人事始知難烈火先燒玉庭蕪不養蘭山夫與  
刺史相對兩巔屹又云干祿無便佞宜知黜此身負  
郎尤小小國夸大頻頻孤宦心肝直天王若死真朝  
庭無諫議誰是雪韓人又云誰憐野田子海內一韓  
侯左道官雖樂剛腸得健無武侯功名生地獄禮教  
死天囚莫言耕種好須避蒺藜秋此三詩出于山人  
之口豈非公議在草茅耶

王昌齡五言云北登漢家陵南望長安道上有枯樹  
根下有頽鼠窠高皇子孫盡千載無人過室白頻發  
掘精靈其奈何又長信愁云邊頭何慘慘已矣霍將

軍部曲皆相吊燕南代北聞功勳多被黜兵馬亦  
分更遣黃頭戍唯當哭塞雲朝來曲云月是鳴  
花連繡戶春盤龍玉臺鏡唯待画眉人代扶風主人  
荅云去時三十萬獨自還長安不信沙場苦君看刀  
箭瘢雜興云握中銅匕首粉剡楚山缺義士頻報讎  
殺人不曾缺荅武陵田太守云仗劍行千里微軀敢  
一言曾為大梁客不負信陵恩越女云摘取芙蓉花  
莫摘芙蓉葉將歸問夫婿顏色何如妾青樓七言云  
白馬金鞍送武皇旌旗十萬宿長楊樓頭少婦鳴笳  
遙坐見飛塵入建章出塞云秦時明月漢時關萬里

長征人未還但使盧城飛將在不教胡馬度陰山採  
蓮曲云吳姬越艷楚王妃爭弄蓮花水濕衣來時  
口花迎入採罷江頭月送歸浣紗女云錢塘江畔是  
誰家江上女兒全勝花吳王在時不得出今日公然  
來浣紗昌齡江寧人舉進士宏詞為汜水尉以不護  
細行貶世亂還鄉為刺史閭丘曉所殺曉不知誰  
與黃祖殺祢衡段簡殺陳子昂事相類史稱其詩緒  
密而思清唐人琉璃堂圖以昌齡為詩天子其尊之  
如此集存者三卷絕句高妙者已入詩選

許渾五言云鷺巢橫臥柳猿飲倒垂藤又云

婦懶蠶出小姑忙題王居士云雨中耕白水雲外斲  
青山題峽山寺云山風寒殿磬溪雨夜舡燈宿石屏  
村云僧歸下嶺見人語隔溪聞題韋隱居西齋云寺  
遠僧來少橋危客過稀又五言云溪冰寒棹響巖雪  
夜窓明又云漁火夜移灣七言云自翦青莎織雨衣  
南峯煙火是柴扉菜妻早報蒸藜熟童子遙迎種豆  
歸又云今夜月明何處宿九疑雲盡綠參差又云山  
齋留客掃黃葉野艇送僧披綠莎又云潮生水郭葉  
葭響雨過山城橘柚踈又云龍歸曉洞雲尤濕麝過  
春山草自香又云猿來近嶺獼猴散魚下深潭翡翠

閑又云青山有雪諳松性碧落無雲稱鶴心又云梧  
楸遠近天官塚未忝高低六代宮又云嵇阮投耒無  
酒客應劉亡後少詩人驪山云聞說先皇醉碧桃月  
華浮動鬱金袍風隨玉輦笙歌迴雲卷珠簾劍佩高  
鳳輦駕北歸山寂寂龍旗西幸水滔滔貴妃沒後巡  
少瓦落宮牆見野蒿登故洛陽城云未忝離離半野  
蒿昔人城此豈知勞水聲東去市城變山勢北來宮  
殿高鷓噪暮雲歸古堞鴈迷寒雨下空壕可憐緱嶺  
登仙子尤自吹笙歌碧堯凌敲臺云湘潭雲尽暮山  
出巴蜀雪消春水來行殿有基荒薺合寢園無主野

棠開四皓廟云避秦安漢出藍閨松桂花陰滿舊山  
自是無人有歸意白雲長在水潺潺渾字用晦任至  
郢州刺史居京口丁卯橋古律詩三卷名丁卯集其  
詩如天孫之織巧匠之斲尤善用古事以發新意其  
警聯快句雜之元微之劉夢得集中不能辨

後村集卷之五十二

後村集卷之五十三

詩話新集

張祐金山寺云僧歸夜舡月龍出曉堂雲樹影中流  
見鍾聲兩岸聞孤山寺云斷橋荒藪合空院落花深  
孟浩然宅云孟簡雖持節襄陽屬浩然送人嶺南云  
珠繁楊氏果翠耀孔家禽別甥云偶作魏舒別聊為  
殷浩吟靈隱師上人云貧知交道薄老信釋門空題  
惠山寺云泉聲到地盡月色上樓多普賢寺云潭黑  
龍應在巢室鶴未還又云中摩亭前棗教郎見赤心  
又云青雲舊李白憔悴為酒客贈內人云斜拔玉釵

燈影畔別開紅艷救飛蛾退宮人云開元皇帝掌中

憐流落人間二十年長說承天門宴上百官樓上拾

金錢劉屏山不見金錢打着人之句本此功飲酒云燒得疏黃謾學仙

未如長付酒家錢實常不吃齊推藥却在人間八十

年邠王小管云魏國潛行韓國隨宜春深院映花枝

金輿遠幸無人見偷祀邠王小管吹又云魏國夫人

承主恩平明騎馬入宮門却嫌脂粉污顏色淡掃蛾

眉朝至尊張祜崔涯同時齊名同客淮南時海內承

平揚州繁華為天下第一兩生以風流自命所謂十

二紅樓名姝角妓得其一盼聲價為重祜詩有天下

三分明月夜二分無賴是揚州及人生只合揚州死

禪智山岡好墓田之句其放浪如此然五言如斷橋

荒蘚空院落落花之語林和靖有妙入神之褒同時杜

牧亦云誰人得似張公子千首詩輕萬戶侯今祜詩

存者僅四卷尔然則散落多矣涯詩未之見當攷

錢起海州云山城仙島出海日印堂開又云春泉洗

藥暖晴日度花遲又云入雲投館僻采碧過帆遲又

云漠幟遠成霞胡馬來如蟻又云竹垓秋月冷山殿

夜鐘清又云海潮連月上舟火度煙來又云曲終人

不見江上數峯青不犯詩題一字又云求仲應難見

殘陽且掩關又云秋入并州路黃榆落故關孤城吹  
角罷數騎射鴈還帳幕遙臨水牛羊自下山征人正  
垂淚烽火起雲間又七言云溪雲雜雨來茅屋山雀  
將雛過藥欄春郊云凍風好作陽和使逢草逢花報  
發生題焦道士云綵雲不散燒丹竈白鹿時藏種玉  
田病鶴云獨鶴聲哀羽摧折沙頭一點留殘雪鷺群  
各畏野人机誰肯相將霞外飛不及川鳧長比翼隨  
波雙泛復雙歸碧海滄江深且廣目尽天倪安得往  
雲山隔路不隔心宛頸和鳴長在想何時白霧卷青  
天接影追飛太液前

郎士元送李騎曹云河來當塞曲山遠與沙平寄源  
公云罷磬風枝動懸燈雪屋明謁傅大士云此方今  
示滅何國更分身贈韋司直云客來吳地星霜久家  
在平陵音信疎題精舍寺云月在上方諸品靜僧持  
半偈萬緣空江南尉問俗云避地衣冠尽向南錢起  
與郎士元同時齊名人謂之錢郎二人詩骨体弱而  
力量輕然警句脍炙人口者不可泯沒錢古詩如病  
鶴篇亦有意味郎七言多新意余選絕句錢取五言  
十一首郎取五七言各一首余記唐人雜書載士元  
常对客有馬令無茶分之戲北平王一日飯客士元

預焉坐間北平醉飽設茗供連沃數椀士元老不能  
禁卽席吐利交下滿坐大笑今不憶出處當攷  
益郊五言云試妾與君淚兩處滴池水看取芙蓉花  
今年為誰死長安早春云乃知田家春不入五侯宅  
又云萱草女兒花不解壯士憂又云野客雲作心高  
僧月為性又云風葉亂舞木雪猿清叫山又云借車  
載家具家具少于車又云盧仝歸洛船崔嵬但載書  
又云閣似獨鶴心大于高松年又云拾月鯨口邊又  
云天津橋下冰初結洛陽陌上行人絕榆柳蕭疎樓  
閣閑月明直見嵩山雪

賈島五言云養鷓成大鷓種子作高松又云白石道  
甯煮寒泉冬日春又云竹籠拾山果瓦瓶担石泉又  
云馬曾金鏃中身有宝刀瘢又云山尋樵徑上人到  
雪房遲又云寒草煙藏虎高松月照鵬又云石磬踈  
寒韻銅瓶結夜澌又云踈衣蕉縷細爽味茗芽新又  
云鳥歸山有跡帆過浪無痕又云鳥宿池中樹僧敲  
月下門又云汲井常泉味听鍾問寺名又云高頂白  
雲尽前山黃葉多又云白髮無心鑷青山去意多又  
云秋風吹渭水落葉滿長安又云禹留疏鑿跡舜在  
寂寥祠又云秋月離喧見寒泉出定聞又云木深尤



積雪山淺未聞猿又云一日不作詩心源如廢井又云落日恐行人又云詩隨過海艇七言云古來隱者多能卜欲就先生問丙丁又云霜霞鶴身松子落月分螢影石房開唐詩人以島配郊又有島寒郊瘦之心評余謂未然郊集中忽作老蒼苦硬語禪家所謂一句撞倒牆者退之崛強亦推讓之島尤敬畏有自逆東野先生死側近雲山詩散行之句以賈配孟是師與弟子並行也賈五言有晚唐詩人不能道

姚合五言云水氣詩書軟氣煙筆硯濃又云尋山屐帶齒書石筆無鋒又云夜猿啼戶外瀑木落厨中又云映竹窺猿後劇尋雲採鶴情又云愛異嫌山淺尋幽喜運生又云頗鶴王居士顛狂不稱時弃嫌官似夢珍重酒如師無竹蘆看思山疊石為靜慮留客話古寺覓僧基唯應尋阮籍心事遠相知又云研露題詩潔浦冰煮茗香又云野客嫌知印家人笑買琴又云馮方多識藥失譜廢彈琴又云酒熟听琴酌詩成削樹題又云古廳眠易曉老吏語多虛又云教僕認書簽又云西壁半陳隋送邵州使君云驛路算程多是水州圍管地少于山惜別云似把剪刀裁別恨兩人分得一般愁寄白傳云詩中得意應千首海內嫌官

與一人亡友趙紫芝選姚合賈島詩為二妙集其詩  
語往往有與姚賈相犯者按賈太雕鐫姚差律熟去  
韋柳尚爭等級

溫飛卿五言云鷄聲茅店月人迹板橋霜又云菓落  
見後過葉乾聞鹿行又云牧羊燒外鳴林果兩中拾  
又云拾萍萍無根採蓮蓮有子不作浮萍生寧為藕  
花死俠客行云欲出鴻都門陰雲蔽城闕空劍黯如  
水微紅濕餘血白馬夜頭驚三更灞陵雪七言云  
離芳援近樵家壠麥青青一暎斜寂寞遊人寒食後  
夜來風雨送梨花入云宜男漫作後庭草不似櫻桃

千子紅又云悠悠楚水流如馬恨紫愁紅滿平野野  
土千年怨不平至今燒作死灰瓦又云禱麝成塵香  
不滅拗蓮作寸絲難絕金陵云花庭忽作青蕪國謝  
公墜歌云朱雀航南繞香陌謝郎東墜連春碧鳩眠  
高柳日方融倚榭飄飄紫庭客文楸方罨花參差心  
陣未成星滿池四座無喧梧竹靜金蟬玉柄俱持願  
對局含嘯見千里都城已得長蛇尾江南玉氣繫疎  
襟未許符堅過淮水蔡中郎墳云古墳零落野花春  
闌說中郎有後身今日愛才非昔日莫拋心力作詞  
人過陳琳墓去曾于青史見遺文今日飄蓬過此墳

詞客有灵應識我，霸才無主亦憐君。石麟埋沒藏春草，  
銅雀荒涼對暮雲。莫怪臨風倍惆悵，欲將弓劍奪  
將軍。祕書省有賀監草題詩，作云：越溪漁客賀知章，  
任達憐才愛酒狂。鸕鶿葦花隨釣艇，蛤蜊菰菜夢橫  
塘。出籠鸞鶴歸遼海，落筆龍蛇滿壞墻。李白死來無  
醉客，可憐神彩弔殘陽。

李義山西掖翫月五言云：露索秦宮井，風絃漢殿箏。  
歸墅云：渠濁村舂急，旗高社酒香。蟬云：五更疎欲斷，  
一樹碧無情。煩君最相警，我亦舉家清。哭著明寄飛  
卿云：何因攜度信，同去哭徐陵。陳後宮云：茂苑城如

畫閣門，瓦欲流，還依水光殿。更起月華樓，侵夜鳶開  
鏡。迎冬雉獻表，送臣皆半解。天子正無愁，楚宮云歌  
成。尤未唱秦火入夷陵。公子云：歸應衝鼓半去，不待  
笙調子。初全溪作云：戰蒲知鴈唳，鰲月蒼魚來。越鸞  
云：去應逢阿母，來莫害皇孫。無題云：錦長書，鄭重眉  
細恨，分明月云：妲娥無粉黛，只是逞婬娟。壽安主出  
降云：事等和強虜，恩洙睦本枝。四郊多壘在此禮，恐  
無時。公主嫁田承嗣之子，承嗣握兵而驕，詩意歎唐  
朝之姑息，與嫁冒頓烏孫無異。末句言諸節鎮皆有  
子，皆欲尚主，何以待之。昭肅挽詩云：海迷求藥使，雪

隔猷桃人哭劉黃云空聞遷賈誼不待相孫弘裴明  
府居云試墨書新竹張琴和古松陳後宮云渚蓮參  
法駕沙鳥犯鈎陳鄭大有隱居云石梁高馮月熱路  
細侵雲題李簪壁舊著思玄賦新編雜擬詩撰彭陽  
公誌云敢伐不加点尤當無愧辭詠懷寄舊僚云僕  
馭嫌夫懦孩童笑叔癡小男方嗜栗幼女漫憂葵聖  
女祠七言云一春夢雨常飄瓦落日靈風不滿旗潭  
州云陶公戰艦 賈傳承塵平淮西碑云点竄堯典  
舜典字塗改清廟生民詩公之斯文若元氣先時已  
入人肝脾寄令狐學士云賡歌太液翻黃鶴從獵陳

倉獲碧雞杜工部蜀中離席云雪嶺未歸天外使松  
州尤駐殿前軍楚宮云已聞珮響知腰細更辨絃聲  
菴指纖無題云扇裁月魄羞雞捲車走雷聲語未通  
井絡云堪故君成杜宇可能先主是真龍北齊云小  
蓮玉体橫陳夜已報周師入晉陽寄令狐郎中云休  
問梁園舊賓客茂陵秋雨病相如過李家園云惟有  
夢中相近分卧未無睡欲如何婦娥云婦娥應悔偷  
靈藥碧海青天夜夜心隋宮云紫泉宮殿鏤煙霞欲  
取蕪城作帝家玉筍不綠歸日角錦帆應是到天涯  
于今腐草無螢火終古垂楊有暮鴉地下若逢陳後

主豈宜重問後庭花籌筆驛云魚鳥尤疑畏簡書風  
雲長為護儲胥徒令上將揮神筆終見降王走傳車  
管樂有才真不忝閑張無命欲何如七夕云由來碧  
落銀河畔可要金風玉露時馬嵬云此日六軍同駐  
馬當時七夕笑牽牛如何四紀為天子不及盧家有  
莫愁九日云曾共山公把酒時霜天白菊遠堦墀十  
年泉下無消息九日樽前有所思不奈漢臣裁首節  
空教楚客詠江離郎君官貴施行馬東閣無因得再  
窺錦瑟云莊生曉夢迷蝴蝶望帝春心託杜鵑滄海  
月明珠有淚藍田日煖玉生煙相傳瑟有遠怨清和

四音于此二聯見之或云乃令狐楚家青衣名渾河  
中云九廟無塵八馬迴奉天城壘長春苔咸陽原上  
英雄骨半向君家養馬未無題云春風自共何人笑  
杜破陽城十萬家絕句云臨邛不見馬相如更欲南  
行問酒壚行到巴西覓誰秀巴西惟是有寒蕪宮妓云  
珠箔輕明拂玉墀披香新殿鬪腰支不須看盡魚龍  
戲終遣君王怒偃師夕陽樓云花明柳暗繞天愁上  
盡重城更上樓欲問孤鴻向何處不知身世自悠悠  
吳宮云龍檻沉沉水殿清禁門深掩斷人聲吳王宴  
罷滿宮醉日暮水漂花出城鈞天云上帝鈞天合衆

灵昔人因夢到青冥伶倫吹裂孤生竹却為知音不  
得听庭筠與商隱同時齊名時號温李二人詩記覽  
精博才思流麗其浮艷者類徐庾其切近者類姚賈  
義山之作尤鍛鍊精粹探索幽微不可草草看世傳  
飛卿傲婦翁亦可見其不羈

鄭谷五言云春陰妨柳絮月黑見梨花又云粥蔬貧  
潔淨中酒病風流又云染岸蒼苔古翹沙白鳥鳴又  
云潮來無別浦木落見他山夕陽云長天急遠鴻潯  
陽縣廡野泉當案落汀鷺入衙飛又云縣官清且  
儉深谷有人家一徑入寒竹小橋穿野花確喧春澗

瀟梯倚綠桑斜自說年來稔前村酒可賒七言云愛  
僧不愛紫衣僧又云酒醒薜砌花陰轉病起漁舟鷺  
跡多又云夜深雨絕松堂靜一点山螢照寂寥又雪  
云乱飄僧舍茶烟湿密洒高楼酒力微江上晚來堪  
画處漁人披得一蓑歸秋扇云汗流浹背曾施手氣  
爽中宵便負心七祖院小山云峨嵋咫尺無人去却  
向僧窓看假山海棠云穠麗最宜新著雨嬌饒全在  
欲開時鷓鴣云雨昏青草湖邊過花落黃陵廟裡啼  
游子乍聞征袖湿佳人纔唱翠眉低讀李白集云何  
事文星與酒星一時鍾在李先生高吟大醉三千首

留著人間伴月明燕云低飛綠岸和梅雨亂入紅樓  
棟香梁閑机硯中闌水淺落花徑裡得泥香千言萬  
語無人會又逐流鶯過短牆谷集名雲臺編有詩三  
百五七言多警聯今錄其尤者于編谷詩自好然集  
中所作若步趨薛能者讀能集云李白欺前輩陶潛  
仰後塵太白視谷斐然小子淵明人物高勝何至仰  
能輩後塵哉然余所錄以意義為主不可以人廢言  
薛能春日寓懷七言云青春背我堂堂去白髮欺人  
故故生獻僕射云朝廷有道青春好門館無私白日  
閑楊柳云隋家力盡虛栽得無限春風屬聖朝閑題

云舊將已成三僕射老身尤是六尚書漢南春望云  
幾處松筠燒後死誰家桃李亂中開自古浮雲蔽白  
日洗天風雨幾時來老僧云清瘦形容八十餘瓠懸  
籬落似村居勸師莫羨人間有幸是元無免破除能  
詩十卷僅數百首絕句佳者已入選其未入選者姑  
摘出一聯或一二句又答寄茶七言云麤官乞與真  
拋却賴有詩情今得常令此一聯不在集中殊不可  
曉鄭谷師若人詩安詩高

秦系五言云掃地青牛卧栽松白鶴栖又云漚亭成  
魚網剝椰作酒危又云上簾疑晚景卧筆覓新秋又

云謝安無箇事忽起為蒼生李尊師山居云洗藥每  
臨新瀑水步虛時上冢高峰系詩僅百餘首趣尚清  
修然自天室至正元先隱剡川後徙南安九日山又  
客丹陽壽八十餘不應賦詠寂寥簡短如此必有遺  
軼者世傳系晚與妻仝離當是送妻歸丹陽耳韋蘇  
州與系詩知掩山扉三十秋魚鬚翠碧棄墻頭莫道  
謝公方在郡五言今日為君休韋公五言獨步一世  
而憐者亦士如此薛能輩總道得一聯半句便妄自  
尊大矣

方十五言云落葉憑風掃香粒倩水春贈喻鳧云纒  
吟五字句又白幾莖髭又云吟成五字句用破一生  
心又云坐月何曾夜听松不似晴又云獵者聞踈磬  
知師入定迴又云樹影搜涼卧苔光破碧行又云踈  
磬白雲寺孤砧紅葉村寄清越上人云窓接停猿樹  
巖飛浴鶴泉鄉叟云青山前代業老樹此身移七言  
云鶴盤遠勢投孤嶼蟬曳殘聲過別枝哭喻鳧云撰  
碑縱託登龍伴菅真應支賣鶴錢贈崔明府云壓酒  
晒書充檢點修琴取藥似交關與鑿休上人云山夜  
獵徒多信犬雨天村舍未催蠶送王霖赴舉云北闕  
上書衝雪早西陵中酒趁潮遲寄陳端公云雲鳥採



茶常失路雪龕中酒不闌扉送永嘉王令云浮客若  
容開茂地釣翁應免稅苔田廢宅云樵叟和巢伐挑  
李牧童兼草踏蘭蓀東陽道中云醉醒已在他人界  
尤憶東陽昨夜鐘過姚監故居云不敢要君徵亦起  
致君全許似唐虞讜言昨嘆離天听新塚今聞入縣  
圖琴鎖壞窓風自觸鶴歸喬木夜難呼李書弟子何  
人在檢点尤逢諫草無哭陳陶云巢父 客兒方干  
字雄飛新定人猶寢兔缺始見姚合合卑之及覽其  
詩駭目變容宥散館之登山臨水必預焉合稽太守  
王龜以其亢直宜在諫署薦之合王薨事寢卒光啟

文德間臨終語其子曰吾詩人自知之誌吾墓者紀  
其歲月而已其詩高處在晚唐諸公之上

韓偓火蛾云陽光不照臨積陰此生類非無惜死心  
柰有賊明意幽窓云手香江橘嫩齒軟越梅酸又云  
和裙穿玉鐙隔袖抱金鞭又云強語戲同伴圖郎聞  
笑聲呂對歸本院云坐久忽疑槎犯斗歸來無恐海  
生桑如 公冷笑東方朔唯用詼諧侍漢皇錫宴云不  
敢通宵離禁直晚來殘醉入銀臺苑中云外使調鷹  
初得按中官過馬不教嘶望歌錦繡雲霄裡獨許詞  
臣醉似泥湖南少舍桃有感云苦筭恐難同象七酪

漿無液堂蟻蛛每歲初進先賜李士欲明云岳僧互乞新詩去

酒保頻徵舊債未贈隱送云蜂彈窓紙塵侵硯烏闌

庭花露滴琴寄隱者云長松夜落釵千股小港春添

半水腰失鶴云幾時翔集來華表每日沉吟看画屏

安分云謀身拙為安蛇足報國危曾將虎鬚殘春云

樹頭蜂抱花鬚落池面魚吹柳絮行八月六日云御

衣空惜侍中血國璽幾危皇后身倚醉云分明牕下

開裁剪遍敲欄干喚不應醉著云漁翁醉著無人喚

道午醒未雪滿舡寄道信云夜來雪壓前村竹剝見

溪南幾尺山暮春云四時最好是三月一去不迴惟

少年亂後野塘云世亂他鄉見落梅野塘晴暖獨徘徊

細舡衝水鳥飛還住袖拂楊花去却未季重舊遊多

表逝于山新賦極悲哀眼看朝市成陵谷始信昆明

是劫天翠碧鳥云天長水遠網羅稀保得重重翠碧

衣挾彈少年多害物勸君莫近五陵飛梨花云曾愁

香結破顏遲今見妖紅委地時若是有情爭不哭夜

未風雨美西施美或詞云美楚宮傾國本此鬆髻云髻根鬆慢玉

釵垂指點花枝又過時坐久暗生惆悵事映人勻却

淚胭脂韓偓與吳融同時為詞臣偓忠于唐為朱三

面斥眚責不悔如捋虎鬚之句人未常誦似為香奩

所掩及宋三篆弒僇羈旅于閩時王氏割據僇詩文  
 只稱唐朝官我與淵明稱晉甲子異世同符余讀其  
 集而壯其志錄其警聯于編內三散篇自述其玉堂  
 遭過唐季非復承平舊觀而待詞臣之禮尤然存之  
 以補金臺記之闕

吳融和 學士秋夕禁直偶雪云硯冰裏詔急燈炆  
 惜更殘重陽日荊州云舊閩莫歸戎馬亂故人何在  
 塞鴻未丹陟云山帶梁朝陵路斷水連劉尹宅基平  
 岐下聞子規云但有花知啼血處更無猿替斷腸哀  
 遠俗尼云三峽却為行雨客九天曾是散花人兵後

徑汴云金鏃有昔人拾得芦花無土鳥銜將過九成

宮云魏公碑字封蒼蘚文帝泉聲落野田碑乃歐陽

魏公有宋玉宅云已懷湘浦招魂事更憶高唐說夢

時杏花云獨照影時臨水畔景含情處出牆頭裴公

洛居云門前立使修書懶花下留賓壓酒忙過鄧城

縣云未知堯桀誰非是可使彭殤有短長揚花云百

花長恨風吹落惟有楊花獨愛風潮云暮去朝來無

定期桑田長被此聲移蓬萊若探人閒事一日還應

兩度知山僧云石凹山頭有一僧朝無香積夜無燈

近嫌俗客知蹤跡擬向中方斷石層廢宅云風飄碧

瓦雨摧垣却有鄰人為鏤門幾樹好花空白晝滿庭  
荒草易黃昏放魚池涸蛙爭聚栖燕梁空雀自喧不  
猶淒涼眼前事咸陽一火便成原題湖城縣西槐樹  
云零落欹斜北路中盛時曾識太平風曉迷天仗歸  
春苑暮送鸞旗指洛宮一自煙塵生薊北更無消息  
幸闕東而今只有孤根在烏啄虫穿沒乱蓬吳子華  
詩五言合作絕少七言佳者不減致光致光以忤宋  
三貶囊子華詩有南遷七絕未知所坐何罪往往坐  
致光之黨

崔隱題方干詩云几霄無鶴板雙鬢老漁舟懷孟夷

庚云中原正兵馬相見是何時菊云千歲白衣酒一  
生青女霜臺城云兵未吾有計金井玉构欄歲除夜  
云厭寒思暖律畏老惜更殘兒童不諳事歌吹待天  
明寄頌紹宗云青山無路入白髮滿頭生鶯声云金  
屋夢初菴玉闥人未歸牡丹云若教解語應傾國任  
是無情亦動人黃河云解通銀漢應須曲溪出崑崙  
便不清又云三千年後知誰在何必勞君見太平遊  
禪智寺云思量只合憐憐醉費海平陳一夢中江令  
宅云還有社年金甃井牧童樵叟等閑窺籌筆驛云  
時來天地皆同力運去英雄不自由建康云庾舅已

能窺帝室玉郎遂是預人家又云欲起九原看一遍  
 秦淮聲急日西斜貞州胡常侍云仍聞隴蜀尤多事  
 深喜將軍未白頭魏令公附卷有迴云馬上固慚銷  
 肥肉幄中尤羨愈頭風送梅處士云亂離且喜身俱  
 在存沒那堪耳更聞題張逸人所居云芳樹文君机  
 上錦遠山絲壽鏡中眉詠史云徐陵筆硯珊瑚架趙  
 勝賓朋玳瑁簪中元夜泊淮口云錦帆天子狂兔兔  
 應過揚州看月明寄齊常侍云噴香瑞獸金三尺舞  
 雪佳人玉一圍早發云酷憐一奄平明睡長被雞聲  
 惡破除鄴城云英雄亦到分香處能共常人較幾多

西施云西施若解傾吳國越國亡未又是誰故都云  
 至竟不如隋煬帝破家尤待到揚州嚴陵灘云祖  
 昇選夫子死原陵不及釣臺高范公雲臺不及釣臺高之句本此詠  
 寸云蟾向靜中矜爪距兔隈明處弄精神嫦娥老大  
 應惆悵倚泣蒼蒼桂一輪閨臺春望云越信功夫高  
 以向裴王氣力大于牛未知至竟將何用渭水涇川  
 一向流題潤州妙善前石羊云孫權劉備常合于此紫髯蒼蓋  
 此沈吟狠石尤存事可尋漢鼎未分聊把手楚膠雖  
 美肯同心始皇陵云荒堆無草樹無枝懶向行人問  
 昔時六國英雄謾多事到頭徐福是男兒鸚鵡云莫

恨雖籠翠羽殘江南地援隴西寒勸君不用分明語  
語得分明出轉難曲江云別愁如瘡避還來隱字昭  
諫新城又唐李有詩名脛炙人口有江東集十卷其  
詩自光啓以後屈明以前海內亂離乘輿播遷艱難  
險阻之事多見之賦詠時魏府節度使王智興奪隱  
詩自號詩卷為偷江東集

劉又自問云自問彭城子何人接汝顛酒腸寬似海  
詩胆大如天入蜀云峽色侵天去江聲滾地未逢盧  
仝云上樓腰脚健懷土眼睛穿勸姚合酒云何曾見  
天上着得劉安宅荅孟野云酸寒孟夫子苦愛老義

詩生澁有百篇謂是瓊瑤辭嘲荆卿云白虹千里氣  
血頭一劍義報恩不到頭徒作輕生士姚秀才愛子  
小劍目贈云一條古時水向我手心流臨行馮贈君  
少薄細碎讎義少為俠行因酒殺人亡命合赦出折  
節請書能詩問韓愈接天下士步歸之作冰柱雪車  
二詩出盧仝孟郊石後以爭語不能下賓客持愈金  
數斤去曰此諛墓中人詩耳不若與劉君為壽愈不  
能止歸齊魯不知所終

後村集卷之五十三